



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tiryimym@aolima

yt tir yimym

TAPAK 8

KP Sharma Oli Nepal ato kilonser kumogo

Chopra-i anir Indian athletics team Olympics asayatsü



VOL. XXI ISSUE NO. 273 (ADOK 273)

DIMAPUR TENTONÜ (MONDAY)

CHITENI (JULY) 15, 2024

₹ 5.00

NSCN(IM)-i lanurtem anioktsü merangba noktang

Dimapur, July 14, 2024 (TYO): Assam kübok Tinsukia District nung lanur pezü NSCN(IM) nung adentsüba lia Indian Army-i noktangogo.

Parnoki yagi NSCN(IM) züngsem ka den metetepa aküm aser pai parnok züngsem akümtsü mesüzük ta PRO & Spokesperson, Ministry of Defence, Manipur, Nagaland and Southern Arunachal Pradesh-i ashi.

Osang tejangja ka angazükba sülen Army-i parnok senzusenbongba mita reprang aser nisung kari July 12, 2024 nü lanurtem dang New Tinsukia

Railway Station nungi train ka nung Dimapur-i aotsü tetuyuba agütsü.

Iba jagi Indian Army den Assam Police-i railway station nung surveillance network ka amenoker mita atadang lanur pezü apu, ta PRO & Spokesperson-isa ashi.

Police-i lanurtem dang tekümdangtsü kar shir parnok kinunger ket nung agütsüogo. Indian Army-i osang tejangja nung ajemdaker mapa inyakba ajanga Upper Assam nungi lanurtem telungpur sang nungi kümzükogo ta paisa ashi.

NPCC-i züngsem tasentem pelaa agizüker

Dimapur, July 14, 2024 (TYO): Richard Yimto, Rtd. IGP aser pa kinungtsü Shojila na Congress nung denogo aser tenaprong pelashishia agizüker ta Communications Department, NPCC-i metetdaksü.

Richard ya Nagaland nung taoba minister asür Yamakam'er

jala kinungbo lir aser Lok Sabha MP S Supongmeren Jamir aser Nagaland atema AICC Secretary Incharge Ranajit Mukherjee na lia Congress züngsem aküm.

Onoki tenaprong Congress kibongi pelashishia agizüker aser tena wadang moatsür ta NPCC-isa ashi.

Indian Army aser Assam Police-i NSCN (IM) anema inyak

Guwahati, July 14, 2024 (Agencies): Indian Army aser Assam Police yaritepa Upper Assam nung NSCN (IM)-i tashiyim agi sen saruba inyakyim ka makdokogo.

Indian Army-i Tinsukia District kübok tesem balala mita aodang NSCN (IM) nem tashiyim agi sen sarua agütsür nisung pungu apu.

NSCN (IM) züngsem kati süngolu kibur ka dang nungi Rs 10 lakh meshi. Iba nung ajemdaker bushisüngdanga aodang Over Ground Worker (OGW) ka apu aser iba sullen ano pa den yariteper nisung pezü apu.

Iba inyakyim ajanga NSCN (IM)-i Upper Assam region nung tashiyim agi sen saruba inyakyim nung tetsükdaksü agütsüogo.

Clock Tower area nung JCF-i jangjatsür

Dimapur, July 14, 2024 (TYO): Dimapur kübok Clock Tower temeket nung teloktenji balalai shishilembartem dang nungi ita shia Rs 200 nungi Rs 2000 saruba tebilemtsü atema Colony Council aseme külem senden ka ayonga amendang lemtet kar agiba sülen mapa inyaka arur.

Nisung kar parnok ajangzüksü mechi nung social media nung iba maparen indang osang tai prokshia tenüng menüktsüba atema iba osang jangjashitsür ta Joint Council Forum (JCF)-i metetdaksü.

Churches Colony, NST Colony aser Middle Point nung council aseme ayongzükba senden nung shishilembartemi timtem ajuruba onüktem lemsatop aser iba atema joint council forum ka tentettsü telemtetba ka agia liasü ta parnok ashi.

JCF tajungba nung ketdangtsüba aotsü atema shishilembartemi office ka

lapoktsü ashi aser ibaji April 2024 nungi lapokogo. Shishilembartemisa office inyaksangshia aotsü atema ita shia fee terara sarutsü ashi aser ibaji tashiyim agi masü saka temulungertem dang nungi meshitsü lemtet ta JCF-isa ashi.

JCF tentetba aser inyaksangshiba ya shishilembartemi ashiba nung ajemdaker tenteta inyaker aser onoki ochishia aser tashishitsü melii inyaka arudar ta JCF-isa metetdaksü.

Clock Tower temeket nung unions aser associations-i ozüing alema sarusajiba anema ozüing amertemi mapa tajung inyaka arudar ajisüaka parnok kanga noktangtsü merangaka sen saruba manener. Anungji district administration aser police dang mapa talila kar inyaka iba inyakyim noktangtsü mepishir ta JCF Convener aser Secretary-i sangdong ka nung ashi.

Taoba US Tir Donald Trump-i taküm agitsü merang



Butler, Pennsylvania nung Republican presidential candidate Donald Trump dak injang khaloktsüba sülen Secret Service ketdangtsürtemi pa anir aodang agiba noksa ka angur.

New Delhi, July 14, 2024 (Agencies): Deobarnep taoba US President Donald Trump khasettsü merang saka pa tenarong nung ang injang agi khashia kümzükogo.

Honibarnü (par mapang) Butler, Pennsylvania nung election rally ka nung jembidang iba lendong ya atalok.

"Iba mapang asenok ajak longjemtsüba aser America nung yimya sayutsüba kanga tongtipangba lir. Asenok tashi ita aser akangakanga noktaksüba kanga tongtipang" ta lendong atalokba sülen Donald Trump-i Truth Social post ka nung ashi.

Federal Bureau of Investigation (FBI)-i Trump dak injang khaloktsüba nisung maitsü jangjaogo. Pa ya Pennsylvania nungi arishi küm 20 tain Thomas Matthew Crooks liasü ta FBI-i ashi.

Donald Trump o jembiba

sabang nungi metre 140 shi pilar kilem ka nungi pai injang khaloktsü aser idangji Secret Service agents-i pa khaset.

Iba tatalokba nung Trump'er sentong nung adentsü arur ka khaset aser ana kanga mejungi yiru ta Secret Service-i metetdaksüogo.

"Injang kati kü tenarong achichi ateta akha. Ni langka ka meshitak ta bilem aser idangji injang ola angashi aser kü teküp ateta akhaba metet. Azü aika yimtok" ta Trump-isa Truth Social nung mezüing metetdaksü liasü.

1981 küm US President Ronald Reagan khasettsü merangba sülen US president mesüra major party candidate ka khasettsü merangbaji iba ya mezüing lir.

November 5 election atongtsü ita pezü shi dang lia iba lending atalokogo. Taküm US President

election nung Donald Trump-i Democratic challenger aser President Joe Biden den tokteptsü sentong lir.

Joe Biden-ia Trump amakba aitsüogo aser America nung ibala inyakyim magizüker ta metetdaksüogo.

"America nung ibala inyakyim magizüker. Asenok linük ka ama longjemer iba ya aitsütsüla" ta Biden-isa ashi.

Prime Minister Narendra Modi-i anir alima lennir aikati iba osang angashia aoksaba aser tebilemtsü abenba lemsatopogo.

"Kü medemer taoba President Donald Trump amakba atema tebilemtsü abener. Iba tatalokba khukhua aitsür. Pa tekaratiba nung taneptsü angutsü moatsür. Tasür kibong, yirua alirtem aser America nung sarasademtsür" ta PM Modi-isa ashi.

KSU-i ILP malir dang Mon district toktsür aotsü tuyur

Dimapur, July 14, 2024 (TYO): Konyak Students' Union (KSU)-i Mon district nung inner line permit (ILP) shitak malirtem ajak aotsü tetuyuba agütsüogo.

Mon district nung ILP telatetba anema arua alirtem nem tapet temerenshi agütsütsü ta KSU-isa ashi.

Ozüing alema arua alirtem ya

ozü lokti aser sobaliba asoshi lendong lir anungji onoki lateta aliba ozüing benshitsü aser Konyak nung taginübatem kümzükba ayutsü ta KSU-isa metetdaksüogo.

Bendanger aika ILP melii Mon district-i arur anungji ozüing amertemi Namsa aser Naginimora check gate tem nung

anogoshia ILP checking asütsü ayongzüker ta parnokisa ashi.

ILP malir nisung ka danga Mon district telungi maitdaksütsüla aser yimtsüing o jila nung kaketshir teloktem aser ozüing amertemi iba tebilemtsü süoki ia bilema mapa inyaksü ayongzüker ta KSU-isa metetdaksü.

PM Modi-i mapa crore 8 adokogo ta ashibaji tiyazü: Kharage

New Delhi, July 14, 2024 (Agencies): Küm pezü tsüingda mapa tasen crore 8 adokdaksüogo ta Prime Minister Narendra Modi-isa ashiba sülen anogo ka lir Prime Minister-i tiyazütem ta Congress-i aitsüogo.

"Narendra Modi-i yashi Mumbai nung mapa agütsüba indang tiyazü otem jembidango. Iba atema nai National Recruitment Agency (NRA) tenzüksüadang ashiba bilemtetdaksür. August 2020 nung nai NRA ya lanur crore aika atema tajangzük asütsü ta ashi. Iba general eligibility exam ajanga tatidang aika agiba agentsü aser mapang den

rongsen aika kümzüksü ta ashi. Iba ajanga tashishitsü melii inyaksangshitsü ta naisa shiogo" ta Congress president Mallikarjun Kharage-i PM Modi dang ashi.

"Küm pezü tsüingda NRA-i kechiba tatidang ka dang ketdangtsüba magi? Parnok nem Rs 1,517 crore lemküksüba nungi kechiba Rs 58 crore dang amshi? NRA ya sorkar mapatem nung nisung anioktsü atema tentet. SC, ST, OBC aser EWS nisungtem asoshi reservation temeten rakzükba agitsü atema NRA ya asaa mapa meinyaki ayur asü?" ta Kharage-isa Modi dang asüingdangogo.

"NTA (National Testing Agency) ya tatidangtem tim mesüi agitsü aser papers leak asütsü atema amshi aser NRA-i tatidang ka danga ketdangtsüba magi. BJP-RSS-i education system samatsütsü aser lanur tarutsü samatsütsü tezüngzüktep agiogo. Onoki tesüiba nunga NRA onük lemsatopogo saka Modi'er sorkari iba atema ola madoker" ta Kharage-isa ashi.

Reserve Bank of India report ka nung mapa tasen crore 4.7 jungnüa adokogo ta ashiba nung ajemdaker Honibarnü Prime Minister Modi-i opposition aija liasü.

Jiribam nung CRPF jawan ka tepset, asem yiru



Guwahati, Chiteni/July 14 (Agencies): Deobarnü Manipur kübok Jiribam district nung meita atar amakba mapang Central Reserve Police Force (CRPF) jawan ka asü aser Jiribam Police Station nungi Sub-Inspector (SI) ka densema nisung asem yiru.

CRPF indang 20th Battalion aser Manipur Police personnel meyoktepa aliba security team ya taoba mapang khatepba dak sendakba nung search operation ka atema Monbung yimtsüing leni aodang anepdang 9:40 ako meta mejangjaba nisungtemi amak.

Manipur police nungi Sub-Inspector ka, state forces nungi commando ka aser CRPF züingsem ka khatepba mapang yirua liasü, ta ketdangsür temi ashi.

Iba lendong asüsang CRPF jawan ya Bihar nungi arishi küm 43 tain Ajay Kumar Jha ta jangjaogo.

Telungpur südi ta temulung melemteti alirtemi parnok patrolling senzüdak injang khalokja parnok tsüingta khatep. Iba tesem nung tangokba video ka nung sepaitem indang SUV ka injang agi khasar liasü aser tesülen windshield jaksar liasü, anungji iba gari telung nung aliba police commando tem dak tenük yoker amakba amai angateter.

"Onoki meyiper akha aser onok amakertem arem leni jena ao. Parnok aputsü atema arem ajak mesüdoka operation tenzüka lir," ta police ketdangsür kati ashi.

Iba lendong atalokba sülen Assam Rifles, Manipur police,

BSF aser CRPF nungi security forces tem iba tesem bushia ao aser combing operations tenzüka.

Manipur Chief Minister N Biren Singh-i iba tatalokba aitsü aser Kuki telungpur dak temulung melemi bilemba pai social media post ka nung ashi.

Tawa Jiribam nung Meitei kin aser Hmar kin tsüingta raratepba sülen tensa mejungi kuma aliba mapang iba lendong ya atalok.

2023 küm May ita kin balala tsüingta azüdokshiba sülen Manipur nung mapang tatsüka süngjema liasü.

Ajisüaka taoba ita Jiribam nung mepetmesü adokba ajanga kin anaprong nungi nisung meyririjang aika pei yutsür relief camp tem nung jenok aser kar arütsü alema Assam leni ao.

NSCN/GPRN-K (Niki) ajanga asükhu lemsatep

Dimapur, Chiteni/July 14 (TYO): NSCN/GPRN-K (Niki) ajanga sangdong ka nung, Purana Bazaar 'B' nungi Additional Secretary Ino. Diganjoy Kachari s/o Late Matilal Kachari anojungi July 12, 2024 nü District Hospital Dimapur nung asüba mang ayimer, ta ashi.

Pa temang manemi mozüki nung taneptsü bushia munga liasü.

Pa linük tenzüka wadang nung 2021 küm aden aser bendanga agütsür saksalema

asem temulung ajak agi linük tenzüka liasü, ta ashi.

Pai Naga nung asoshi anibelem mesasai meranga inyakba atema pa tenüing Naga nung puti otsü nung teti alitsü.

Mangyimer kibong den NSCN/GPRN ajanga asükhu lemsateper aser parnok mulungjang nung Tulusang Tsüingremi anisüingzük aser tashi tasen agüjang ta sarasademtsür. Asür tanüla tesunep nung anisüingzükjangma, ta sangdong ajangasa ashi.

Lok Sabha nung Congress Deputy leader inyaktsü Gaurav Gogoi shim

Guwahati, Chiteni/July 14 (Agencies): Lok Sabha nung Congress indang Deputy leader inyaktsü MP Gaurav Gogoi shimogo, ta Congress general secretary (Organization) KC Venugopal-i Deobarnü ashi.

Tang tesüsa nübu shimba atema Congress Parliamentary Party Chairperson Sonia Gandhi-i Speaker Om Birla dangi züluogo aser yangji MP Kodikunnil Suresh ya Chief Whip alitsü. MPs Manickam Tagore aser Dr Md Jawaid na whips ama shim.

"Lok Sabha nung Congress Party atema Deputy Leader, Chief Whip aser Whips ana shimba indang metetdakja CPP Chairperson Sonia Gandhi-i

Lok Sabha Speaker dangi züluogo," ta Venugopal-i social media X nung züluo liasü.

Gogoi ya Lower House nung party indang deputy leader asütsü aser Kerala nungi MP tiben buba inyaksang Kodikunnil Suresh ya party indang chief whip asütsü, ta pai ashi.

Gaurav Gogoi-i Assam nung aliba Jorhat Lok Sabha menden nungi Lok Sabha election nung Bharatiya Janata Party (BJP) candidate Topon Gogoi madak votes 1,44,393 agi takok ngua liasü.

Taoba mapang Congress party ajanga Rahul Gandhi ya Leader of Opposition ama shima liasü.

Kiset shirur balala atema tzü agütsüyim: Dr. S Sarendi Walling



Dimapur, Chiteni/July 14 (TYO): Kiset shiruru junga metsütettsü atema tzü tajung peria agütsütsü kanga tongtipang lir. Azü shilem 80 shi tzü lir, tzü yagi temang temperature shidak yutsür aser digestion, jana indoktsü aser nutrients agizükba ama temang shilem inyakyim nunga tongtipang, ta Dr. S Sarendi Walling, ACTO (Animal Science), KVK, Yisemyong ajanga ashi.

Chiyongtsü nung metsü tali aliba ajanga tzü tali nungdaka

akumer, chiyongtsü nung tzü aliba yagi tongtipang shilem agir.

Tashi kanga agütsüba chiyongtsü tepok nung digestion atema tzü tali nungdaker. Environmental temperatures, kiset shiruru tabu balala aser temang tuozük dak ajemdaker tzü ya nungdaker. Mamatzü agüja aliba aser techanu bentsüba shirurui tzü tali nungdaker aser shiruru ainba ama tzü nungdaker, ta pai ashi.

Mashisa aliba ak kati

anogo nung tzü liters 10 nungi 12 tsüingta nungdaker, techanu bentsüba aliba ak kati anogo nung tzü liters 20 nungi 30 tsüingta nungdaker, ak chanu ka ainba mapang anogo nung tzü liters 6 nungi 8 tsüingta nungdaker aser ak tebung kati anogo nung tzü liters 12 nungi 15 tsüingta nungdaker.

Ak nem tzü peria magütsüra parnoki chiyongtsü achiba ajema akumtsü aser iba yongji parnok temang tuozük ajema akumtsü.

Nashi yagi rem, monü mesüra tu takong seret ka achitsü atema tzü liters pongu tashi nungdaker. Nashi yagi mamatzü liter ka agütsütsü atema tzü liters asem bosa nungdaker. Mamatzü jenti agütsüba nashi yagi anogoshi tzü liter 150 dak tema nungdaker. Aser tziüngsang-mopung tatsük mesüra takong nung tzü tali nungdaksü.

Nashi kati anogo nung tzü liters 40-50 nungdaker, nashi tebung-i anogo nung tzü liters 45-55 nungdaker, mamatzü agütsüba nashi kati mamatzü liter ka agütsütsü atema tzü liters 5 nungdaker, küm ka tain nashi kati anogo nung tzü liters 25-40 aser techanu kati anogo nung tzü liters 15-25 nungdaker, ta ashir.

Mashisa aliba azümongshi tuozük seret 4.5 shi kati anogo nung tzü liters 0.35 nungdaksü, azümongshi hopta trok shi tain aser tuozük seret 1 shi kati anogo nung tzü liter 0.3 nungdaksü.

Hopta 12 shi tain aser tuozük seret 2.3 shi azümongshi kati anogo nung tzü liter 0.64 shi nungdaksü aser seret 3 shi azümongshi tebung kati anogo nung tzü liter 0.39 shi nungdaksü. Kasaji tuozük seret 1.5 shi azümongshi tetsü kati anogo nung tzü liter 0.29 shi

nungdaksü.

Yamaji broiler an ya hopta ka nungi pezü tsüingta tain 1000-i temperature 21° C anogo nung tzü liters 50-260 tashi nungdaksü aser kasa an yagi temperature 32° C nung tzü liters 50-415 nungdaksü.

Hopta 5-8 tain an 1000 yagi temperature 21° C anogo ka nung tzü liters 345-470 nungdaksü aser 32° C nung tzü liters 550-770 nungdaksü.

An yagi asükwa nung tzü tajemba agir aser lemiwa nung timba agir. Ano entzü agütsüba an (temang tuozük seret 1.6-1.9) tejang 1000-i anogo nung tzü liters 250 shi nungdaksü aser küm ka majung an (temang tuozük seret 1.5) tejang 1000-i anogo nung tzü liters 105 nungdaksü.

Mamatzü/shi agütsüba aser entzü/shi agütsüba shiruru temi tzü ajemba ya tzü indang quality daka tuluka keta lir. Tzü nung tezüknem menemra shiruru temi majemtsü aser temang mejungi akumtsü aser tasüa asütsü. Tzü nungi adokba tashidak nungi kumzüka alitsü atema shiruru nem tzü tajung agütsütsü tongtipang lir, anungji kiset shiruru metsürtemi item yimya meteta shiruru anepalura tajangzük alitsü, ta Dr. S Sarendi Walling-isa ashi.



July 14, 2024 nü Kolkata nung West Bengal Assembly nung opposition lenir aser BJP lenir, Suwendu Adhikari leniba nung BJP lenirtemi Lok Sabha election sülen rara tatalokba balala anema longkak aitdang tangokba noksa nung angur.

Muslim Board-i Uttarakhand nung UCC anema ken o benoktsü

New Delhi, July 14 (Agencies): Amongnü All India Muslim Personal Law Board (AIMPLB)-i, tang tesüsa Supreme Court-i balalular aliba tetsürtemi 'Iddat' mapang nung kinüngbu dang nungi senotsü teyari meshitsü atema temelaba agütsüba obendang anema parnoki ken o benoktsü, ta metetdaksü. AIMPLB-isa Uttarakhand state nung agizükba Uniform Civil Code (UCC) ozüng anema ken o benoktsü, ta metetdaksü. Amongnü All India Muslim Personal Law Board working committee senden amenba mapang nung onük balala benoka o lemtepa liasü. Board otongdar, Syed Qasim Rasool Ilyas-i, "Senden nung onoki bangzüng ti renemogo. Mezüngbubaji tawa Supreme Court obendang indang lir. Iba obendang ya Sharia ozüng den meputeper. Bangzüng ajanga, Islam yimsü nung kiyimbaji kanga temeshi ama züngshir. Islam yimsü ajanga balalulaba nokdangtsü atema meranga inyaker. Supreme Court obendang ya tetsürtem pusema

lir, ajsüaka kiyimba tsütsülen nungi iba obendang ya tetsürtem atema timtem ka akümtsü. Balaba sülen-a teburtemi tetsürtem nem teyari agütsütsü süra kechiba pai balatsü? Tesendaktep raksara ibaji ajanga shiba timtemtsü? Iba obendang agientsü atema onoki legal committee den asüngdangtepa inyaksü," ta metetdaksü. UCC dak sendakba nung Syed Qasim Ilyas-i, Muslim Board legal committee-i Uttarakhand nung UCC ozüng anema ken o benoktsü atema inyaksangshi tenzükogo, ta metetdaksü. "Inyakyim tapu balala alibaji asen linük maitsü lir aser asen linük temzüngia ibaji wazüka ayur. UCC ajanga ibaji anentsütsü meranger. UCC ya linük temzüng alema dang masü saka yimsü temeden anema lir. Uttarakhand nung agizükba UCC ajanga ajak nem timtem agütsür. Uttarakhand nung UCC anema ken o benoktsü atema onoki telemteba agiogo aser legal committee-i iba atemaji inyaksangshi tenzükogo," ta paisa

metetdaksü. Worship Places Act of 1991 dak sendakba nung pai, "Asen linük nung Babri Masjid raksatsüba tatalokba jakdang Worship Places Act 1991 ta ser ozüng ka liasü. Nisung ajaki India nung yimsü dak sendakba mangatettep tatembangbubaji Babri Masjid asütsü ta bilema liasü, ajsüaka mangatettep tasen aika adokba ya tia maka. Onoki court dang Worship Places Act kübok item ama mangatettep ken o magizüksüla ta mepishir. Onoki Supreme Court dang tang tesüsa adokba mangatettep balala ya religious act nung züngoktsü mepishir," ta paisa shisem. "Tawa Lok Sabha election osang ajanga vote agütsürtemi tesempa aser tsükchitep anema vote agütsüba kuli angur. Ajsüaka loktii nisung tepsetba manener. Election osang sangdongba sülen-a loktii nisung tepsetba tatalokba 11-12 lir. Nisung kari ozüng alema inyakra ozüng kübok parnok nem temerenshi agütsütsü temeden lir," ta paisa metetdaksü.

Congress party-i Gaurav Gogoi Lok Sabha nung Deputy Lenir shim

New Delhi, July 14 (Agencies): Amongnü Congress party-i Gaurav Gogoi Lok Sabha nung Deputy Lenir shim aser Mavelikkara nungi MP, Kodikunnil Suresh Lok Sabha nung Chief Whip shimogo, ta party osang ka ajanga metetdaksü. Party-isa Virudhunagar MP, Manickam Tagore aser Kishanganj MP, Md Jawaid na Whips shim. Congress-i shidi ka ajanga Lok Sabha speaker, Om Birla nem item osangji metetdaksü.

Whip aser Chief Whip teinyaktsü shilemji party nung telongjem alitsü aser tazüokba alitsü atema ketdangtsütsü asoshi lir. Whip ji yimtenren party ka nung party züngsemtemi party nem dang vote agütsüdaktsütsü asoshi lir aser Chief whip ji party nung lenirtem rongnungi tambusang lir aser pa kübok whips anir. Congress General Secretary, KC Venugopal-i X ajanga iba osang metetdaksüba den külemi tang tasen shimmertem nem tenüngsang agütsü.

Venugopal-isa, Sonia Gandhi-i shidi ka ajanga Lok Sabha Speaker Om Birla nem Deputy Leader, Chief Whip aser Whips ana shimba osangji metetdaksüogo, ta ashi. Congress General Secretary-isa, "Opposition Lenir Rahul Gandhi leniba nung Congress aser INDIA teloktep nung party temi Lok Sabha nung nüburtem atema inyaksü," ta metetdaksü. Taoba ita Congress-i Rahul Gandhi Lok Sabha nung Opposition Lenir shima liasü.



July 14, 2024 nü Chennai nung Tamil Nadu Congress Tir, K Selvaperunthagai leniba nung party lenirtemi yimsü balala amangertem tsüngda tesünep nung alitsü ayongzüka shilem agia jajadang tangokba noksa nung angur.

Tesüiba küm pezü tsüngda mapa crore 8 adokdaksü: PM Modi

New Delhi, Chiteni/July 14 (Agencies): Honibarnü Ato kilonser Narendra Modi-i, tesüiba küm 3-4 tsüngda linük nung mapa crore 8 adokdaksüogo, ta metetdaksü. Gari lenmang, railways aser port sectors atema sen crore 29,000 indang project balala atema Ato kilonseri lung azüngia liasü. Mumbai kübok Goregaon nung ayongzüka sentong nung jembidang Modi-i, "Tawa RBI (Reserve Bank of India)-i mapa dak sendakba report tejangja sangdongogo. Iba report apibo tesüiba küm asem-pezü tsüngda mapa crore 8 adokdaksüogo. Iba osang ya ajanga mapa dak sendakba osang tiyazü

prokertem ola madokdaksü kümogo," ta metetdaksü. "Iba linük nung skill development aser mapa nungdaker aser iba atemaji ozü sorkari inyakdar," ta Ato kilonserisa metetdaksü. Mumbai aser temeket nung infrastructure project balala ajanga yimti aser temeket nung connectivity tajungba kümdaktsütsü, ta pai ashi. "Ozü sorkar kümsük tasembuba ya investors tulu-tila ajaki pelaa agizüker," ta paisa ashi. "Maharashtra ya alima nung rongsenkettzüng tashi tulu aliba tesem ka kümdaktsütsü aser Mumbai ya alima nung fintech capital kümdaktsütsüji kü nükjidong lir," ta paisa shisem.

BSP lenir Armstong tepsetba ken o nung tai tonglokja alir ka khaset

Chennai, July 14 (Agencies): Tamil Nadu nung BSP Tir, K Armstrong tawa tepsetba ken o dak sendakba nung tai tonglokja alir tongti ka Amongnü Chennai nung khasetogo. Nisungba jagi police dak züker jena aotsü merang, ta police-i metetdaksü. Armstrong tepsetba ken o nung tali tonglokja alir, K Thiruvengadam ji tesem ka nung parnoki miima aliba raraba hadir kar kaktettsü atema north Chennai-i anir oa liasü, iba mapang nungji pai police ka dak azük aser jena aotsü merangdang police ketdangser kati pa dak injang khaloktsü. K Armstrong tepsetdang amshiba hadir balala bushitsü atema police-i Thiruvengadam anir oa liasü. Pa dak injang khaloktsüba sülen pa hospital kati anir ao saka doctor temi pa tasü bener aru, ta ashi. Armstrong tepsetba ken o dak sendakba nung police-i nisung 11 pua alir aser parnok rongnung arrshi küm 30 dak tema, Thiruvengadam densema lir. Tesüiba mapangtem nunga pa anema ozüng alema inyakba

ken o aika benoka lir. Anogo ana tejaklen Chennai nung aliba court kati bushisüngdangtsü atema tai tonglokja alirtemji anogo pongunü atema police ket nung agüja liasü. July 5, 2024 nü Chennai nung telok kati Armstrong tepseta liasü. July 5 aonung 7:00 ako meta Chennai kübok Sembium kiyong nung Armstrong aser party nung inyaker kar par ki anasa o jembia aliba mapang nung nisung trok motorbikes nung aruba sülen Armstrong tepset. Iba sülen police aser state sorkari aibelenertenji aputsü, ta metetdakja liasü. Armstrong ya lawyer ka liasü aser 2006 küm pa Chennai Corporation Council nung shim. Küm ana tejaklen pai Chennai nung sentong tuluka ayongzüka BSP Tir, Mayawati-a jaoka iba sentongji agiba sülen pa kanga nungtugu aküm. Pa tepsetba sülen BSP tongti lenir, Mayawati-i state sorkar dang iba tatalokba ya bushisüngdangtsü atema iba ken o ya CBI nem agütsütsüla, ta takhangba agüja liasü.

GOVERNMENT OF INDIA MINISTRY OF CULTURE INVITING APPLICATIONS FOR GRANT-IN-AID UNDER THE SCHEME OF "FINANCIAL ASSISTANCE TO CULTURAL ORGANIZATIONS WITH NATIONAL PRESENCE" FOR THE FINANCIAL YEAR 2024-25. The Ministry of Culture, Government of India invites applications / proposals from Cultural Organizations under aforementioned scheme with the objective to provide financial assistance to Cultural Organizations having National Presence to meet the expenditure to be incurred on conducting the cultural programmes / festivals etc. Details of scheme guidelines, eligibility criteria, prescribed application format, details of required documents etc. are available on the website of Ministry of Culture i.e. http://www.indiaculture.gov.in/financial-assistance-cultural-organizations-national-presence Eligible applicant organizations should submit two copies of applications, complete in all respect latest by 15th September, 2024 (5.00 PM) at the following address : Director, Eastern Zonal Cultural Centre IB-201, Sector 3, Salt Lake City Bidhannagar, Kolkata-700106, West Bengal Incomplete applications and applications received after last date of receipt of applications WILL BE SUMMARILY REJECTED. Canvassing by the applicant organizations in any form will lead to disqualification of proposal.



TIR YIMYIM YIMOBILEM (EDITORIAL)

DIMAPUR TENTONÜ, JULY (CHITENI) 15, 2024

Arogo sen

Shitakba agibo arogo sen ta masü Tsüngrem meyong sen ta asütsüla saka asenoki angatettsü atema arogo nung tamangertemi ter shilem, tepela, tenüngsang, temoatsü aser mulungso tenla agütsüba ajak ya arogo nunger sen aser arogo nunger rongsen ta jembir aser amshir. Item tenla sen tenla kidang sarudang temenungratsüka ken tena sarur aser sarasadema meshiteter ayur. Iba sen nungi jagi arogo nung tenzükertem nem ita sen agütsür, kechiyong parnokji arogo ta amshir dang ashi arogo masü Tsüngrem tenzükertem aser senji Tsüngrem meyong, anungji arogo ajanga kiburi pei mapa nung inyakertem nem agütsür. Iba denji ano asenoki arogo senji samaa aliba tanelatem anir aruba mapang nunga amshir aser arogo sentong balala nung endoker aser tanüngbaji Jubilee amongba nung endoker. Item ajakji sen kibur Tsüngremer wadang inyakba nung endokbatem asütsü. Ajisüaka, asenoki temulung ashitsüka arogo sen endokbaji tenela mapa nung masü arogo meyong kiojen yangluba nung endoker. Atangji, asenoki tenla ki yanglubajia sen kibursang Tulusang Tsüngrem külemtsü asoshi yanglur, anungji ajia asenok nükdangbo shitak amai angur. Ano, arogo kiojen yanglubajia sen kibur Tsüngremer maparen balala inyaksü bilema yanglur, anungji ajakji sen kibur Tsüngrembo Tsüngremer mapa asoshi inyaker. Ajisüaka, Yisui o entepba nung ki kibur kati par kilirtem nem tajangzük keta amshidaktsütsü asoshi pei pei sempet aser tashi yari sen agütsüba amato arogo senji sen kibur Tsüngrem asoshi tajangzük aketba mapatem nung amshitsü merangtsübaji kanga tongtibang lir. Ashiko, arogo kar nungbo arogo senji Tsüngremer sen masü pei sen ama kümer pei mulungba nung amshia alitsüa akok, kechiyong asenoki aiben arogo sen yabo meinyaki zübazübaa anguba sen amai bilemer, anungji tapayu mali endoker. Ajisüaka, kodang asenoki tenla kidang tenla bendenba mapang nisung shiai pei pei akok aser pei pei mapa nung ajangzüketba yari tenla agütsüba indang to shisadangdir, nisung kabo hopta piyong anü pua tzünglu ajaa ayangba nungi aazükba sen nungi ter shilem bener aruba asütsü, ano nisung kabo yimdong nung aonsutsü yoka amenba nungi aazükba nungi ter shilem abenba asütsüa akok, ano karbo küm piyong nung ak ka jeptetba aser an ka metsütetba nungi yokzükba tenla sen asütsüa akok. Aji oda, nisung karbo office nung ita piyong belemseta mener anguba ita sen nungi ter shilem agütsüba asütsü. Ano, tenla karbo kaketshirtem scholarship sen tera anguba nungi ter shilem agiteta abenba sen asütsü. Iba amaji Tsüngrem nem tenla agütsürtem ajakji pei pei mapa nung anogo shia belemseta inyaker anguba temoatsü nungi pelashishia Tsüngrem nem ta ser tenla agütsürtem lir. Item senji amshia alima nung Tsüngremer yimli tuluba aser tajungba küma yangerba nung sentong tapu balala atonga inyaksübaji koda jangratemtsü ! Ajisüaka, ano külen item senji Tsüngrem tenüng amshia Tsüngremi memulungba mapatem nung amshitsübajia koda tarendaktsü aser tetsübutsüka asütsü ! Itemji angateta kodang asenoki timi inyakdir, arogo nung tenla sen amshia Tsüngremer wadang inyaksübaji jangratemtsüka asütsü aser arogo nung tanela nunga aser rongsen lenmang nunga asentenshi adoktsü. Ajisüaka, tanü asenoki arogo sen amshia tenla ki tajungba yangluli arogo nunger tanela nung tashi maitba kümli, arogo tenzükertem alitsü ki tajungba yanglutsüli arogo nung tenzükertem azümasenba kümli, arogo office tajungba yangluli arogo nung Tsüngrem o rateta ashir maliba-maliba kümli, arogo nunger gari tasenba ka alili arogo tenzükertem tetsüng mekaraba kümli ta ataloka angur. Ashiko, item tatalokbaji angu dang sen kiburi dang masü saka tenla sen abensang anogo sen aa ayangsang to, yimdong nung aonsutsü yoka amenla to, anogo shia pei mapa nung belemseta inyakertem to aser scholarship nungi tenla abenertem to agia tezüdanga bilemdar asütsü. Itemji tensa taji angateta asenok arogo nungertemi asen ajangzüktsü bilema masü sen kibur ajangzükdaaktsütsü bilema inyakra, arogo sen amshia tanelatem kümzüktsü, arogo purtem rongnunga tashimaitertem bushia oagitashi itdaktsütsü aser Tsüngremi moatsüba jala-jabasotema sen kibur, Tsüngremer nükjidong tongtetdakja anepalutettsü.

OLEMSABANG

AMALITEP MAKATSÜ

- P. Renthly Jamir

Aor Baptist arogopur Pastortemi anir 4th June 2024 Impur nung Sentepa lemtet agiba oren ka nung yamai zülua lir. "Iba temepishiba magizüktetra ABAM-i lemteta aliba dak ajemdaker amalitep makatsü" (SLT 2020-07) Tir Yimyim ADOK 267 July 09-2024.

Iba oren nung tangatetba lemsateper. Yangi ABAM-i Komala ka lemteta ali aji shia mali. Saka iba nung ajemdaker amalitep makatsü ta-ang shia lir. Aor sobaliba nung Chungliyimti lima nungi Sobaliba-a arudang nisung ka asoshi tatembangbuba temerenshi tulutibaji AMALITEP MAKATSÜ özüng ya lir. Lai nung ya Yihuda nunger Farisitemi benshiba angur. Iba ya lokti nungi jentokba kecha nunga mamshiba shilem magidaktsüba yongsük nungi züngtokba Lai "Aser parnokji pa jentok" Yohan 9-34. Yisui nükpoker tsüngtsüker zütsüra aketer aika anebtsü tasürtema shia arudaktsü. Saka pai tanaben parnok bushia oa ajurutepeba aika mangur. Saka kodang iba nisung Farisitemi jentokogo ta Yisui angashi (Cast out) Amalitep maka Yisui tanaben nükpoksang den ajurutepe. Kechiyong nisung ka kibong ka yim ka lokti nungi jentokba mapa ya atamata masü. Anungji pa tsüraburia yihuda nungeri jentoktsü tsübuba tulu liasü. Iba ya tatembangbuba temerenshi tulutiba oda Tsüngrem chir Yisui iba temerenshi yabo ulura ta bilema tanaben pa den ajurutepe.

Sobaliba nung senchi tulua achir Ak trok tashia achir aser item sentsühji adianu kinunger senteper aotoktsür aser akhi ama Senso tajung ka küma lokti nung shilem agia alir. Saka kodang yimten aser kidong den amalitep maka ta südir yangjibo anükabang adianu kinungertemi yariteptsü lenmang mali. Iba lemtet nung ya khen mepishia shiti ka zülutsü aser aji magizüktetra ta lir. Aser Baptist tamang Yisui tesayuba nung amendaker aor süra Yisui 490 ben tai atoktsü indang ashiba angur Mathi- 18:22.

Anungji iba lemtet ya Yisui sayuba denbo khenyongi alamajem ta bilemer. Aser tokur toku zep ta shibanga yur ka maliba bushia Lungren lungbang ajak sema senzütsü ta anogoshi tenla kidang ayimtener sendenba lokti nung tepo metsükshir khen shidanger mangara karbo züngsem nungi jentoktsü tasa amokmeren nungbo teintokba ongko inyaker ama bilemer.

Ano ABAM-bo Court-i maotsü ta asüba nung tatalokba tatishitsü ka bena arudi. Yisui 490 ben tai tokang ta shia alinung ABAM-i tangar anema Court-i case bener maotsü saka tangari court-i jara aotsü aser temeden kuli ashitsü. Onok Changtongya Town Tenla ki alikimung atema Ali kiburtemi Changtongya putu Court nung case agütsü. Anungji arogoi tashi angaa putu courtjagi ao. Iba ali ya ni town Committee Chairman asüba mapang alitep asünung ni denasa aotsüsa aküm aser Putui ano sen 3000/- agütsüsemang ta ashi nung arogoi pelashishia hai ta kiburtemi ibajagi tenük masüng Dobashi Court nung case agütsü Anungji anogo ana tashi oa court nungji noktaka kuli asü. Aser Dobashi Courti ano sen 20,000/- agütsüsemang ta lemtettsü arogoi kecha mashishi-i hai ta agizük aser case tembang. Baptist tamangba nungbo courti maotsü ta masü Ajia bangdak anema tashi mangaba lir. Aotsü or ochi kuli asütsü.

Kechiba Molungyimsen Senso mungdangi ABAM anema court nung case agütsü ta kuli bushidanga ora ABAM den teti teka amteper amalitepa onüba agi ta bilemer. Kechiyong tang ABAM lemtet nung ajemdaker Amalitep makatsü ta asüyonga tang ABAM inyakyim yagi Amalitep maka ta sayur Jubilee nung O jembitsü Sarasademtsü sentong nung jaok saka mao. Iba maoba kuliji amalitep makaba agi maoba lir

Anungji ya kechi tai ta metettsü temeden bushia Courti ao südi ta bilemer. Aser aija alir ka pei temeden shidangtsü Laishibai nokdanga mali. Paul-ia pa aitsüba temeden kuli Roman yimli nung yimsüsür Governor ana tashi melentepa Court case metembangtet (Felika aser Festa) nung pai yamai ashi "Ni Kaisar tonga jembishitsü" T.mapa- 25:11 Kechiyong alima ka nung Court tatembangbaji Chubaji lir. India nunga court tematiba tai atoktsü tashiji President lir. Anungji Impur limaji Aor tashi tawar Imso Imosonger tashi temetet toktepa Nüklak Songtepdak lima ka mekümdaktsü Tai tokteper Sama-a aliba san bushitepeba temeshi yimti ka südaktsütsüla. Alemlu limapur mapang-a Senso külem tzübu tzü ajemer ka tapi agi jentokra yimren maka tsüksüngonsüng masür nübu tajung mesoteter ta jembia atsü anem kateper lia aru.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Bihar nung Hindu yimsü alia amangertemi pastor ka jabaso tepset



July 14, 2024: July 7, 2024 aonung Bihar nung Hindu yimsü alia amangertem kari pastor Sushil Kumar'er ki kakpoka atuba sülen par jabaso tepsetogo, ta International Christian Concern (ICC)-i metetdaksü. Arwal district nung Pastor Kumar'er jabaso, Nilesh Kumar par kima veranda nung amoi oa lia Hindu yimsü alia amangertemi pa teka anaprong sükdangtsü aser alenseta südaksü. Iba sülen parnoki tasü mangji kimai atsüzüka bener oor aou-rong ka nung temangji metaa yutsü.

Yangji aliba Hindu yimsü alia amangertemi pastor Kumar'er kibong joko mapang tatsüka amokmerena arua liasü. Parnoki pastor kibong dang Khristan yimsü toktsür Hindu yimsü agizükang ta rongshia aru. Pastor Kumar-i police dang, kiyong nung aliba high-caste Hindu nungertemi par jabaso tepsettsü ta amokmerener, ta aiben metetdakja aru. India tesem aika nung Khristantem reshikangshir mesüra Khristantem tepsetba tatalokba aika lir, ajisüaka

Bihar nungbo item ama tatalokba ya kangabo mali. Tesüiba küm 10 tashi pastor inyaka arur Pastor Harendar Kumar-i, state nung Khristan tepsetba ya tang mezüng ataloker asütsüa akok, ta ashi. Anasa aliba Arogo ka nung pastor Harendar Kumar-i, "Onok anema nokdakertem mali mesüra onok tenzükba wadang nung timtem agütsürtem mali. Bihar nungbo reshikangshi kangabo mali, anungji tawa pastor jabaso tepsetba ya ajanga onok kanga süngmanger aser kanga aoksar," ta metetdaksü.

China nung ketdangsertemi Khristantem anema tesashiba inyaksü

July 14, 2024: June ita tatembanglen China nung Communist sorkar ketdangsertemi linük nung yimsü aser Khristantem anema tenokdangba ano tesashiba benoktsü atema sentong renemogo, ta International Christian Concern (ICC)-i metetdaksü. Ketdangsertemi senden anaben tashi ayongzüka June 27-28 anogotem nung Xi'an, Shaanxi nung o lemtepa mapang nung ketdangsertemi linük nung underground churches anema ano tenokdangba tesashiba benoktsü jembiogo.

Sorkar ketdangsertemi azüokba Three-Self Patriotic Movement (TSPM) Arogo nungi lenirtema aika item senden nungji aden. Senden nungji China Communist Party (CCP)-i linük nung Khristan yimsü jungjunga azüoktsü atema bangjem. Ketdangsertemi Arogo lenirtem dang, nenoki sayutsüngidang linük Tir, Xi Jinping tesayubatem (socialism aser communist tangatetbatem) densema sayutsüla, ta metetdaksü. C o m m u n i s t ketdangsertemisa sorkari

melaba TSPM Arogotem nung lenirtem dang sayutsüngiba densema Arogo inyaksangshi ajakji ketdangsertem tetuyuba nung dang inyaksüla, ta tuyu. June 26 nüa linük yimtiba, Beijing nung Sinicization of Religion Conference ayongzüka liasü, aser iba conference nungji tongti ketdangsertem aika aden. Iba conference nung okila jembidang Central United Front Work Department minister, Shi Taifeng-i, "Socialist loktiliba agizükteta yamaji alitsü atema China nung sobaliba kübok yimsü balala azüoktsüla," ta jembia liasü.

Pope Francis-i Indonesia linük semdangtsü

July 14, 2024: Pope Francis-i alima nung Muslim nung nütüng teimba aliba linük Indonesia semdangba mapang nung linük nung yimsü balala tsüngda taremsüktep nung alitsü atema ajungshitsü, ta International Christian Concern (ICC)-i metetdaksü. September 3-6 anogotem nung Pope-i Indonesia semdangba mapang nung pai Cathedral Church nung tongti putirtem ajurutsü aser Istiqlal Mosque nunga yimsü lenirtem ajurua yimsü balala amangertem telongjem nung alitsü atema ajungshitsü. Indonesia nung nütüng

shilem 80 shi Sunni Muslim nungertem lir aser nütüng shilem 11 dang Khristantem lir. Indonesia nung Khristantem yimjak nung tekülem agitsü atema temelaba agüja lir saka aiben Muslim nungertem aser local sorkar ketdangsertemi Khristantem anema inyaker. Talisa Islam yimsü toktsür Khristan yimsü agizükertemi reshikangshi kanga ajuruba dang masü saka parnok kibongtemia parnok sendoker. Mongolbarnü linük yimtiba, Jakarta nung aliba State Palace Complex nung osangbenertem den jembidang

Minister of Foreign Affairs, Retno Marsudi-i "Pai (Pope) yimjung aser taremsüktep koda tongtibang, iba osangji bener arutsü," ta metetdaksü. Pope-i Indonesia semdangba mapang nung September 5 nü Central Jakarta nung aliba Gelora Bung Karno (GBK) stadium nung tekülem sentong agitsü. Iba sentong nungji linük tesem balala nungi Khristan meyirjang aika adentsü imlar. Tanga yimsü amangertem densemabo nisung meyirjang 70 shi iba sentong nungji adentsü imlar, ta ketdangsertemi metetdaksü.

ANOGO ABEN TSÜNGREM DEN

Sempettem Rom 8: 28-39

Kechiyong tesüiba süshia, taküm süshia, kotak tenyartem süshia, yimsüsürtem süshia, tang alibatem süshia, tarutsü alibatem süshia, ain aketbatem süshia, tema nung aliba süshia, telung nung aliba süshia, tangar teyangluba oset süshia, asen Kibuba Khrista Yisu dak aliba Tsüngrem temeim nungi asenok piladaktsütsü makoktsü ta ni chichia amanger. Rom 8: 38-39.

Oh! Koda tejangja. Kechaia Tsüngrem temeim asenok nungi bener aotsü makok.

Asenok meketa tashi aikati asenok nungi aji bener aotsü meranger. Kaji asenoki pei sasa meimba. Asenoki Tsüngrem temeim dang nungi asen taküm, temang, asen mapa, asen temeten mesüra asen rongsen taoba züngshir. Asenoki kotak ajangzüktsü merangba dang nungi alima nükjitungang arishir.

Asen meketa Tsüngrem temeim den toktepa tashiji alima lir. Asenoki sen tali penputsü alimai atitanger, tangari tali metetta kümdaktsüner aser konang tali aginüba agi asenok atitanger. Aser Khrista nung Tsüngrem temeim asen meketa aliba den aritepdang tebilemdangba makar.

Satani item Tsüngrem matenba tashiji koda meimer! Pai akoktsüba lemanng ajak aser temeten bushitsü aser temulung süa alitsü shisatsü agütsütsü mapang tajung teti bushir. Alimai inyakba ama inyaksü teti ajungshir.

Saka aji tokjang. Tsüngremi ne taküm asoshi atsütepba nung dang ne den atener masü saka na asoshi rarar. Tatok agütsüba Pa temeimi ne taküm piyong, teti taküm tashi, na yaritsü. Pa dak aser Pa O nung amangang.

Ne tenüng asanger, Tsüngrem Yisu tenüng nung onok den teti dena liang. Amen.

Pakistan linük nung Muslim nungertemi Khristan ka tepset

July 14, 2024: Pakistan nung jabaso Lahore yimti nung aliba tanur pezü tebu Khristan ka tepsetogo, ta Khristan melungtet telok- Centre for Legal Aid, Assistance and Settlement (CLAAS)-i metetdaksü.

July 10, 2024 anepdang züngla arrshi küm 28 Khristan, Marshall Masih tepset.

Masih tebu, Yaqoob Masih-i, "Anepdang 4:20 ako meta Muslim nung tebur ana ozü kilem kolaklen nungi ki telungi aita liasü. Tebur ana jagi mejangjaba nisungtema kar anisemer liasü," ta metetdaksü.

Yaqoob Masih-isa, "Onok amoi oa aliba mapang nung parnok ki telungi aitba sülen parnoki ozü jabaso dak injang khaloktsü. Pa kanga mejungi yirua ali nung ondak. Injang ola den külemi onok teyari meshia ayimdenba olaji angashia kiyongertem adenshi saka iba mapang tashi nungjibo parnok jena oadoker liasü," ta metetdaksü.

Iba tatalokba sülen onoki

hospital kati anir ao saka pa mekümzükteti asü, ta paisa metetdaksü.

Iba tatalokba sülen iba tesem nungji alir Khristantem lenmanng nung adenshir longkak aita liasü.

Khristantemji Mall Road nung adenshiba sülen Punjab province nung Chief Minister dang tekeraba nung aibelenertemji aputsüla, ta takhangba agütsü.

Khristantemi ashiba agi, Marshall kshasetertemji temesepba mozü ayokertem lir, aser tawa ang parnok jail nungi chioka liasü.

Marshall-i pa kinüngtsü Mehdi den jabaso ka aser jala asem toktsür pilaogo. Par kibong ya Lahore nung aliba Catholic Cathedral Arogo nung züngsemtem lir.

CLAAS ya interdenominational organization ka lir aser parnoki Pakistan nung reshikangshi ajangshiba Khristantem atema inyaker.

AO OSHI ANGAZÜKDAK: TANÜ ANGAZÜKTSÜBA OJANG



Tajichi

(n) teka ajichilen (right hand side)

* Nisung teimbakati teka tajichi agi zülur.

Tajidaksü

(adj) tereprangdaksü (let not see)

* Tanur nem noksa tamajung tajidaksü.

OLONG PAITEP # 6846

Grid for crossword puzzle #6846 with numbered squares.

TIPLIN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6845 TELANGZÜBA

TIPLIN :

- 1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

- 1. Temesen, 2. Raksa,
3. Aon, 4. Aso, 6. Nile,
9. Alizüng, 10. Omen,
11. Lemta, 13. Ola, 14. Kin.

NAI-A YA METETTER MA



Madhya Pradesh sorkari July 14, 2024 nü world record ka yanglutetogo aser iba ya ghonda 24 tsündga süngdong teimtiba atemba atema lir. Iba sentong ya Indore nung ayongzüka agi aser Chief minister Mohan Yadav-i Guinness Book of World Records nungi kulikaket agizük.

Union home minister Amit Shah-ia Indore nung 'Ek Ped Maa Ke Naam' programme nung shilem agi aser pai ashiba agi süngdong lakh 11 atemba sülen iba yimti dang 'green city' ajatsü.

IIT-Guwahati convocation nung kaketshir 2,150 graduate asü



Guwahati, July 14, 2024 (Agencies): Assam nung IIT Guwahati-i Deobarnü 26 buba Convocation Ceremony sentong ayongzüka agiogo aser otsüsütsüsa kaketshir 2,150 nem degrees agütsüogo.

Iba sentong nung Zoho Corporation Founder & CEO Dr Sridhar Vembu-i tongti tesemdanger ka ama aden.

Taküm graduate asürtemji BTech and BDes students 932, MTech and MDes students 655, PhD& Dual (Masters + PhD) students 277, MSc students 182, MA students 54, MS (Research) students 34 aser MBA students 16 lir.

BTech in Computer Science and Engineering nung Vedant Gaurang Shah-i BTech/BDes batch nungi tematiba takok angu aser pa nem President of India Gold Medal agütsü.

"Onoki IIT Guwahati indang 26 buba Convocation kanga nüma tanga amonger. Iba sentong ajanga graduate asüba kaketshirtemi merangba aser bendanga agütsüba sayur. Parnoki academic aser research nung takok tajung nguogo" ta IIT Guwahati Director Prof Devendra Jalihal-ia shi.

"Onoki merangba ajanga NIRF 2023, Times Higher Education Impact Rankings,

Nature 2024, aser QS World University Rankings 2025 nung IIT Guwahati züngsemogo" ta pai ashi.

"Departments 11, academic centers 9, academic schools 5 aser AAHII Hospital dena IIT Guwahati ajanga academic excellence dang masü saka research aser loktiliba asoshi inyaker" ta Prof Devendra-isa ashi.

IIT Guwahati lapoker küm 30 tashi arudang kaketshir 22,600 graduate süogo.

Zoho Corporation Founder & CEO Dr. Sridhar Vembu-ia Convocation o jembidang takok angur ajak nem tenüngsang agütsü.

Kuki Inpi-i security aser administrative setup balaka meshir

Guwahati, July 14, 2024 (Agencies): Jiribam district kübok Sejang aser Mongbung jawan ka asü aser iba inyakyim aitsür ta parnokisa ashi.

Ozüng alema mapa inyakba ajanga yimdaklir noklang aika jena ogo aser iba ajanga timtem tuoshi jenti ajurur ta Kuki Inpi-isa metetdaksü.

Tang tashi nung Kuki-Zo nunger 45,000 tema pei talidak toktsür ogo ta parnokisa ashi.

sepaitemi Meitei telungpurtem yaritepa amakdang CRPF jawan ka asü aser iba inyakyim aitsür ta parnokisa ashi.

State forces, Arambai Tenggol dena valley-based insurgent groups (VBIGs) aser CRPF sepaitemi külemi July 14 anepdang 9:40 ako nung amak ta Kuki Inpi-ia shi.

Huidrom Premjit, DIG, CRPF lenisüba kübok CRPF India sorkari tiyongtsüi aita

Kuki-Zo nunger kümzüka ayutsü asoshi mapa inyaksü ayongzüker ta Kuki Inpi-isa metetdaksü.

Parnokisa Kuki-Zo tesemtem nungi "Meitei" central armed forces agientsü aser "Meitei state forces" noktangtsü takhangba agütsüogo.

Manipur sorkari human rights anema inyaker anungji Kuki-Zo nunger asoshi administrative region balaka agütsütsüla ta Kuki Inpi-isa ashi.

Assam Police STF-i Rs 17.5 crore alang drugs apu



Guwahati, July 14, 2024 (Agencies): July 14, 2024 nü Assam Police-i tatalokba ana nung Rs 17.5 crore alang drugs puogo.

Chief Minister Himanta Biswa Sarma-ia X nung iba atema tenüngsang agütsüba metetdaksüogo.

Assam Police nung Special Task Force (STF)-i kanga

meranga inyakba ajanga heroin aika apu ta CM Sarma-ia shi.

Katabari, Guwahati nung parnoki mita aodang heroin gram 308 angu aser iba dak sendakba nung nisung ana apu. Ano Rajapukhuri, Golaghat nunga STF-i heroin seret 1.732 apu aser iba dak sendakba nung nisung ana pua lir.

"STF-i kanga dang nendaka

drugs anema mapa inyaker aser sorkari #DrugsFreeAssam atema tenangzüka agia inyaksangshir" ta Chief Minister Sarma-isa ashi.

Assam Police-i drug network anema mapa tajung inyakba atema tenüngsang agütsür aser iba ajanga sorkari war against drugs tashi itdakttsür ta Sarma-isa metetdaksü.

KP Sharma Oli Nepal ato kilonser kümogo



KP Sharma Oli

Kathmandu, Chiteni/July 14 (Agencies): Nepal tir-i Deobarnü Communist Party of Nepal-Unified Marxist Leninist mendenbuba KP Sharma Oli Ato Kilonser asütsü shimogo.

PM Pushpa Kamal Dahal 'Prachanda'-i parliament nung floor test agiba majangtetba sülen Oli shimogo.

Tir Ram Chandra Paudel-i achayanga Oli aser tanga cabinet züngsemtem tenangzüktepba Hombarnü anepdang agitsü.

Hokolbar aonung Oli-i, Constitution Article 76-2 dak ajemdaker NC tir Sher Bahadur Deuba teyari nung Ato Kilonser mapa atema takhangba ka agüja liasü. Pai House of Representatives (HoR) züngsem 165 indang signature benoka liasü. Item HoR tem rongnung par party nungi züngsem 77 aser NC nungi 88 liasü.

CPN-UML-i taoba hopta NC den tashi lemsateptsü

atema tenangzüktepba ka yangluba sülen, arishi küm 69 tain Communist Party of Nepal-Maoist Centre (CPN-MC) mendenbuba Prachanda pusema aliba nungi atsüngba sülen Parliament nung floor test agitsüsa aküm.

Floor test agiba mapang Prachanda-i parliament nung züngsem 275 aliba nungi vote 63 dang angu. Vote of trust akoktsü atema vote 138 bo sa nungdaker.

2008 küm nungi Nepal nung interim Constitution ka benoka inyaksangshia arudar aser sorkar 13 tashi melentepa aruogo, aser iba mapang Dahal, Deuba, aser Oli nungeri melentepa Ato kilonser mapa bena arudar.

Oli ya pro-China lenir ka ama züngshir aser pai Brehostibarnü par party-i 'Prachanda' tokja Nepali Congress den longjemer sorkar tasen ka tentetsü atema telemtetba agiba jangjashija liasü

aser ashiba agi, yimden yimsüsüba tamendakdak tashi ita toktsütsü aser linük terenlok atema iba ya nüngdaka liasü.

Oli 2015 küm October 11 nungi 2016 küm August ita 3 nü tashi Ato Kilonser liasü aser iba mapang Kathmandu aser New Delhi na tesendaktep mejungi aküm. Iba sülen pa 2018 küm February 5 nungi 2021 küm May 13 nü tashi PM liasü.

Pai mezüng PM mapa abenba mapang Oli-i Nepal telung ken o nung jushiba atema yimjak nung India aitsü aser par sorkar atsüngtokba atema India dak tai tongokja liasü.

Happy 80th Birthday Otsa Supongsangla (Ungma)



Temeim Otsa,

Tanü onoki na küm tir (80) ajungba monga pelatepdang, onoki nai Tsüngrem dak tamang ayuba aser onok meimba maneni bilemteter. Na asen kibong asoshi tongshi; nü Sarasadem onok taküm lemanng asoshi milen.

Tanü, teti ama, asen teyanglur Tsüngrem dang nü nem anema aliba den külemi arishi talang maojang da Sarasademtsür.

~ Temeim nung, Kinüngo, Chirnurtem, Anükapang aser Semchirtem

Palestine nungertemi Israel anema West Bank nung longkak ait

Jenin, Chiteni/July 14 (Agencies): Honibarnü Israel-i al-Mawasi safe zone maka nisung 90 tepsetba den nisung 300 shi yirutsüba anema West Bank nung aliba Palestine nungertemi longkak aitogo.

Israel-i anüing ajanga Khan Younis anüolen refugee camp ka amakba anema Deobarnü longkak aitba sentong nung West Bank kübok yimti timbakati shilem agia liasü. Honibarnü Palestine nungertemi Jenin, Hebron aser Tubas yimtitem nung iba rara anema longkak aita liasü.

Palestine nunger social media account tem ajanga Deobarnü Jenin, Bethlehem nung Dheisheh refugee camp aser Tulkarem nung longkak

aitzü atema ayongzükba sülen telangzüba agüja dokantem shibanger aliba sayuogo.

Ramallah nungi Al Jazeera osangbener Nour Odeh-i ashiba agi, Gaza nung aliba külem Palestine nunger atema parnoki inyaktetsü aliba ajak agi ya dang ta Palestine nungertemi ashi. Parnokisa October 7 nü sülen occupied West Bank nung Israel-i tesem balala tali meita aoba anema iba longkak aitba sentong ayongzükogo, ta ashi.

Gaza indang Ministry of Health-i Deobarnü sangdong ka ajanga ashiba agi, Israel-i Gaza amak tenzükba sülen Palestine nunger 38,584 tepsetogo aser nisung 88,881 yirutsüogo.

Kasa mapang nung Gaza

nung rara tenzükba sülen West Bank nunga Palestine nungertem anema jenjang talila agia arudar. Israel nunger sepaitemi Palestine nunger telok balala tali meita aoter aser iba sülen Yihuda nungertemi Palestine nunger yimtsüngtem tali amak tenzükogo aser iba ajanga Palestine nunger telungpurtemia telangzüba agütsü tenzükogo.

Palestinian Prisoner's Society-i Deobarnü sangdong ka ajanga ashiba agi, taoba anogo ana tsüngda Israel nunger sepaitemi West Bank nung Palestine nunger 30 puogo. Israel-i anogoshia amai occupied West Bank meita odar aser Palestine nunger 10,000 shi puogo.

Trump khasettsü merangsang tenüing FBI-i sangdongogo



Butler, Chiteni/July 14 (Agencies): Taoba US Tir Donald Trump dak akhasang ya Thomas Matthew Crooks alitsü ta FBI-i sangdongogo.

Pa ya arishi küm 20 tain liasü aser Bethel Park, Pennsylvania nungi lir, ta sangdong ajanga ashi.

Honibarnü Pennsylvania nung rally alidang Trump dak injang agi akha aser prangbong injang ishika akhaba sülen Secret Service agents temi taoba tir ya lungbanga liasü. Pa ya kanga kera sapang nungi lungbaner anizüka gari nung anioker ao aser New Jersey nung par kidangi meyipa ogo.

Pa junga lir aser law enforcement officers dang pelar, ta Republican National Committee (RNC) website nung sangdong ka ajanga ashi. FBI-i iba tatalokba ya Trump khasettsü merangba ama

amshir ta ashir. Trump-i pa indang Truth Social network nung injang ka agi pa achichi tenarong temalen khapoktsü ta ashi.

"Itangji ni langka meshidak südi ta metet aser itangji mopung nung ola ka, prangbong ola angashi aser kü takep alema injang toko. Azü kanga ayim, aser iba sülen ang kechi asüar ni metet," ta Trump-i zülutsü.

Pa anüker temi arsanga anir aodang Trump indang tenarong aser tejak nung azü yima aliba jangja angu.

FBI ajanga sangdong nung iba tatalokba metembang aser bushisüngdangba mapang lir ta ashi. Iba tatalokba sülen tetsübotsü maka ta Pennsylvania police-i ashir.

Temulung melemi alisang ya idakjisa US Secret Service sniper kati khaset, ta iba agency

indang odongtar Anthony Guglielmi-i ashi.

Iba mapang anasa nokdaka alir ka asü aser ana kanga sashia yiru, ta pai ashi. Par asemprong ya tebur dang, ta ketdangsür temi mapang tatsüka lir ashi.

Crooks ya AR-style rifle ka bena liasü aser iba tesem nungi metre noklang ishika pilar ki ka nungi khaloktsü, ta police temi ashi. Agency-i iba ya khasettsü merangba ta amshir, ta Special Agent Kevin Rojek-i ashi.

Crooks ya ID bena meliasü aser bushisüngdang temi DNA amshia jangjatet, ta ashi.

Trump tepsettsü merangba mapa ya kechi nukjidong nung inyakar ano mejangjateti lir, ta Rojek-i ashi.

State voter records nung Crooks ya Republican züngsem ka liasü ta sayur aser pai 2021 küm liberal campaign telok ka nem sen \$15 tenla agütsü ta ashir. US tir asoshi Republican candidate yagi Butler, Pennsylvania - November election atema tongtipang state - nung o jembu tenzükter mapang tatsüka tsüngta iba lendong ya atalok.

Trump-i pa melensang Tir Joe Biden aser par administration indang jembiba mapang injang akhaba ola ya angashi.

Pa bhusemer aika Trump sülen placards amer nokdaka liasü. Tenük kuli alir Greg-i ashiba agi, Trump sapangi arur minute pongu shi orr nisung ka kilem nung apua aoba pai angu. Pai police dang iba nisungba ya sayu ta ashi.

Tir Biden-i par ki aliba Delaware state nungi jembidang iba tatalokba ya tesempatsü mapa ta aja.

"America nung iba ama azüdokshi mapa inyaker alitsü tesem maka. Nisung ajaki ya aitsütsüla."

Tir Biden ya Washington DC-i meyipa marudang Trump den jembidango, ta White House-i ashi. Trump ya 2020 election tanaben agishir ama Tir Biden den tokteptsü lir.

Biden den külemi party anaprong nungi yimten yimsüsür temi iba lendong aitsür.

Taoba tir Barack Obama-i asen democracy nung 'political violence' asoshi khenyongi tesem mali aser taoba tir sashia meyiruba atema temulung anisüngzükter, ta ashi.

Trump indang taoba tatong tir Mike Pence-ia kinungtsü tenati taoba tir asoshi sarasademtsür ta ashi aser America nunger ajak dang parnok den külemi sarasademtsütsü ajungshi.

UK Ato Kilonser Sir Keir

Starmer-i anir linük balala lenirtemi iba lendong aitsü aser pai Trump indang nübuyim sentong nung atalokba lendong ya ngur aoksar ta ashi.

Ajisüaka Trump-i Hombarnü Milwaukee nung sentong ka nung par party nomination agizüktsü lir, ta pa indang nübuyim ketdangsür temi ashir. Butler rally nungya pa indang 'running mate' (tatong tir) tenüing sangdongtsü liasü ta kari ashir.

Republican telok nungi nisung karibo iba lendong asoshi Tir Biden tenüing asener.

Trump indang vice-presidential candidate asoshi shima lir südi ta bilema alisang Senator JD Vance-i ashiba agi, Biden nübuyim nung o meshidak jembiba ajanga iba ya atalok.

Republican congressman Mike Collins-ia tiri ajungmesoa tepsettsü merang ta aitsür.

Kasa mapang tashi tait House oversight committee mendenpuba James Comer-i Secret Service indang director jaoktsü ta shiogo.

India Ato Kilonser Modi-ia social media X nung, "Kü tembar taoba tir Donald Trump dak akhaba atema kanga jashir. Iba tatalokba khukhua aitsür. Asür kinungertem, yirur alirtem aser American nüburtem den ozü sarasadem lir," ta zülutsü.

Chopra-i anir Indian athletics team Olympics asayatsü

Chiteni/July 14, 2024 (Agencies): Tebur javelin throw asaya nung Olympic aser world champion arishi kum 26 tain Neeraj Chopra-i anir India nung track & field team asayatsü. Athletics Federation of India (AFI) selection panel-i takum Olympics atema track & field asayar 28 tenung sangdongogo.

Asayar 28 agi kumtetba Indian athletics contingent nung tetsür asayar 11 densema lir, shirnok July 26 nü nungi tenzüka asayatsü aliba Olympics nung shilem agitsü.

Track & field tetoktepba ya Paris nung Stade de France stadium nung August 1 nungi August 11 nü tashi asayatsü.

Paris Olympics atema India athletic team:

- * Neeraj Chopra (men's javelin throw)
- * Avinash Sable (men's 3000m steeplechase)
- * Kishore Jena (men's javelin throw)
- * Tajinderpal Singh Toor (men's shot put)
- * Praveen Chithravel (men's triple jump)
- * Abdulla Aboobacker (men's triple jump)
- * Sarvesh Kushare (men's high jump)



- * Akshdeep Singh (men's 20km race walk)
- * Vikash Singh (men's 20km race walk)
- * Paramjeet Singh Bisht (men's 20km race walk)
- * Muhammed Anas (men's 4x400m relay)
- * Muhammed Ajmal (men's 4x400m relay)
- * Amoj Jacob (men's 4x400m relay)
- * Santhosh Kumar Tamilarasan (men's 4x400m relay)
- * Rajesh Ramesh (men's 4x400m relay)
- * Mijo Chacko Kurian (men's 4x400m relay)
- * Suraj Panwar (race walk mixed marathon)
- * Jeswin Aldrin (men's long jump)
- * Kiran Pahal (women's 400m)
- * Parul Chaudhary (women's 3000m steeplechase and 5,000m)
- * Jyothi Yarraji (women's 100m hurdles)
- * Annu Rani (women's javelin throw)
- * Abha Khatua (women's shot put)
- * Jyothika Sri Dandi (women's 4x400m relay)
- * Subha Venkatesan (women's 4x400m relay)
- * Vithya Ramraj (women's 4x400m relay)
- * MR Poovamma (women's 4x400m relay)
- * Prachi (women's 4x400m relay)
- * Priyanka Goswami (women's 20km race walk and race walk mixed marathon)
- * Ankita Dhyani (women's 5000m)

Copa America: Uruguay tasembuba nung tembangogo

Chiteni/July 14, 2024 (Agencies): Copa America asayamung nung tasembuba jenjang atema Uruguay aser Canada na asaya penalty metsütepba sülen Uruguay-i goal 4-3 agi kokogo. Asaya nung mapng apuloktsür asayaba mapang Luis Suarez-i goal ka idakja goal kasasa akümba sülen team ana penalty metsüteptsüsa aküm.

Penalty metsütepba mapang Canada nung asayar Ismael Kone-i metsüba ball goalkeeper Sergio Rochet-i nokdang aser Alphonso Davies-i ball metsütepba sülen Uruguay-i asaya koka liasü.

Charlotte's Bank of America Stadium nung asaya ya atakzükja aliba mapang tashi nung team anapronglai goal 2-2 agütsür tembangba sülen penalty metsüteptsüsa aküm.

Asaya nung mezüngbuba goal ya Uruguay atema Rodrigo Bentancur-i idaktsü, ajisüaka Canada nung asayar Kone aser Jonathan David nati goal kaka idaktsüba sülen Canada goal 2-1 agi tejakdang aküm.

Ajisüaka asaya tanabuba shilem nung atakzükja aliba mapang tembanger mapang apuloktsür asayaba mapang minute tanabuba nung Suarez-i goal ka idakja goal kasasa aküm.

Penalty metsütepba mapang Uruguay atema Federico Valverde, Giorgian de Arrascaeta aser Bentancur nung ajaki goal idaktsüba sülen Suarez-ia goal idakja parnok 4-3 agi tejakdang aküm.

Iba sülen Canada atema Davies-i metsüba ball crossbar nung ondaker meyipa adoka Uruguay-i asaya koka liasü.

Uruguay coach Marcelo Bielsa-i ashiba agi, par team penalty metsüteptsü temsüa maliasü aser parnoki asayamung tepeyong junga masayatet, ta ashi.

"Roster reprangdangra onoki iba dang nungi tajungba asayateter lila ta bilemer," ta pai ashi. Kasa mapang nung Canada coach Jesse Marsch-i, par team-i asayamung tepeyong junga asayatetogo ta shia tenüngsang agütsü, kechiyong iba asayamung ya parnok atema 2026 World Cup asoshi tamendakdak ka liasü, koba United States aser Mexico na den parnoki külemi ayongzükja asayatsü lir.

"Onok team tasen lir. Mapang tatsüka tsüngda aser team tajungtem den asayaba mapang tactical model ka yangertsü temela masü," ta pai ashi.

Taoba mapang France coach Blanc Al-Ittihad manager kumogo

Chiteni/July 14, 2024 (Agencies): Taoba mapang France coach Laurent Blanc, Saudi Pro League club Al-Ittihad indang manager kumogo.

2023 kum September ita tangatetep nung Lyon toktsüba sülen Blanc ya mapa makai liasü. Pai club toktsüba mapang parnok Ligue 1 nung ponglang nung liasü.

Arishi kum 58 tain coach yagi Marcelo Gallardo melenogo. Asian Champions League atema qualify mesütetba sülen Marcelo-i 2023-24 season

tembangba sülen club tokja liasü. Al-Ittihad nung Blanc, külem France nung asayar Karim Benzema aser N'Golo Kante na den longjemtsü.

Laurent ya taoba mapang Bordeaux, France, Paris St-Germain, Qatari club Al-Rayyan aser Lyon indang coach liasü.

Blanc lenisüba nung Bordeaux puri kum 10 sülen 2008-09 season nung Ligue 1 title aben. PSG nung inyakba mapang pa lenisüba nung club-i championships asem akok aser paisa, France team 2012 Euro

nung quarter-finals tonga ania liasü.

Asayar ka ama Blanc, France, Italy, Spain aser England nung Montpellier, Barcelona, Manchester United aser Inter Milan nung amala team nungi asayaogo. United nungi asayaba mapang pai 2003 kum Premier League koka liasü.

Al-Ittihad puri Saudi Pro League tekuben koka lir aser parnoki tesüsa 2022-23 kum Saudi Pro League kokogo, saka taoba season parnok pongububa nung tembanga liasü.

BCCI-i Anshuman nem sen crore 1 teyari agütsü

Chiteni/July 14, 2024 (Agencies): Board of Control for Cricket in India (BCCI)-i taoba mapang India nung cricket asayar Anshuman Gaekwad ne senotsü teyari agütsüogo, shiba cancer agi tonger temang anepaludar. BCCI secretary Jay Shah-i Apex Council dang pa nem senotsü teyari sen crore 1 agütsütsü tetuyuba agüja liasü.

Senotsü teyari agütsüba den Shah-i Gaekwad'er kinungertem den tongtepretepa tensa asadangogo aser tenüngdakba teyari ajak agütsütsü nangzükogo.

Gaekwad temang anepalua aliba mapang BCCI-i pa maneni asadanga alitsü tenangzükba agütsüba den pai iba tashidak ya koktetsü imla ataba lemsatepogo.

Cricket board-isa, timtem tekangshi nung aliba mapang taoba mapang asayar aser par

kibong maneni nongita yaritsü mulunga aliba lemsatepogo.

Taoba mapang India cricket team captain Kapil Dev-ia, BCCI dang Gaekwad nem teyari agütsütsü mepeshia liasü.

Arishi kum 71 tain Gaekwad ya tashidak agi tonger temang anepalua liasü.

Dev, shiba lenisüba nung India team-i 1983 kum World Cup koka liasü, pai ashiba agi, taoba mapang cricket asayartem telok kati Gaekwad temang anepaluba mapang intokba nung amshitsü atema senotsü bendena liasü.

Iba telok nung Mohinder Amarnath, Sunil Gavaskar, Sandeep Patil, Dilip Vengsarkar, Madan Lal, aser Ravi Shastri nung densema liasü.

Item taoba mapang cricket asayartem ya külem asayar asoshi senotsü bendentsütsü atema inyakyim balala nung mazüngi inyaka liasü.

Paris Olympics nung PV Sindhu group tajung ka nung ataogo

Paris, Chiteni/July 14 (Agencies): India nung anaben Olympic medal ngua alila PV Sindhu aser HS Prannoy na July 26 nungi tenzüksü aliba Paris Games nung group temela atatsüogo.

Rio Games nung silver medal nung Tokyo Olympics nung bronze angula Sindhu ya seeded 10 nung lir.

World number 13, Sindhu ya Paris Olympics nung tetsür kija badminton asayaba Group M nung ataogo, kong Estonia tsür Kristin Kuuba (WR 75) aser Maldives tsür Fathimath Nabaaha Abdul Razzaq (WR 111) nung lir.

Olympic medal tasembuba angutsü temulungtetba nung alila Sindhu ya group temela ka nung liaka round of 16 nung lai China tsür seed trok buba He Bing Jiao ajurutsü akok.

Lai Jiao ajangtetra quarterfinals nung China tsür Olympic champion Chen Yu Fei ajurutsü amai lir.

Olympics matongdang arishi kum 29 tain Sindhu ya jangratema masayateti arur aser lai Summer Games nung medal tasembuba angutsü atema khenyongi balaka meranga asayatsü nungdaker.

Kasa mapang India nung Prannoy ya tang mezüngbuba Olympic nung asayatsü lir aser pa tang seed 13 buba nung lir, aser Paris nung tebur kija badminton asayaba Group K nung pai Vietnam nung Le Duc Phat (WR 70) aser Germany nung Fabian Roth (WR 82) akoktsüla.

Tebur kija asaya nung India nung tebur tanabuba Lakshya Sen, rank 19 ya Group L nung ataogo.

Pa indang group nung Indonesia nung world number three Jonatan Christie lir. Tena den Guatemala nung Kevin Cordon (WR 41) aser Belgium nung Julien Carraggi (WR 52) lir.

Pei group nung Prannoy aser Lakshya na temaba tenjang tongtetra round of 16 nung tena ajuruteptsü.

Tetsür tarep asaya nung World number 19 Tanisha Crasto aser Ashwini Ponnappa ya Group C nung lir.

Tena group nung Japan nung world number 4 Nami Matsuyama aser Chiharu Shida, south Korea nung Tokyo Olympics bronze medallist Kim So Yeong aser Kong Hee Yong (WR 7) aser Australia nung Setyana Mapasa aser Angela Yu (WR 27) lir.

India nung tebur tarep Satwiksairaj Rankireddy aser Chirag Shetty ya India nung medal angutsü asoshi tajungtiba lir. Tena ya tebur tarep asaya nung seed tasembuba nung lir.

Ajisüaka draw nung tareb asayar indang ken o Court of Arbitration of Sport (CAS) ajanga jembitsü aliba mech Paris Olympics atema tebur tarep draw masayai thinena lir.

Badminton World Federation (BWF) ajanga iba draw asayatsü anogo ano mesangdong. Paris Olympics nung badminton ya July 27 nü nungi asayatsü lir.

BILEMDANGANG

"Ajak nung tetemsü akümstsü temerang: aji tamakoktsü."